

肖

巖

詩

鈔

肖巖詩鈔卷九

涇上趙良霽肅徵甫著

舟行東阿望梁山

水宿已期月夢中失屣顏行行至東阿始得見梁山
茲山當大道我親行其間未覩烟巒妙但嫌亂石頑
及茲縱遙睇邂逅逢翠鬢突如出天表忽焉隱林端
山勢無低昂舟行有彎環始知心所喜何必躬爲攀
蓬山不可卽海市聊得觀

堤上晚步

綠楊陰裏葛衣輕一洗舟中鬱氣清溼暑困如穿

輒坐野涼快似踏冰行
林梢風勁吹殘雨
水面雲馳放晚晴
彷彿江南南岸意
教人歸去學躬耕

南旺分水龍王廟

海運阻風濤陸輓勞
丁民會通舊河一開浚
轉漕法自垂千春爾時宋尚書
適遇白老人老人建策尚書用
乃於東平築壩當戴村七十二泉
合入汶邈注南旺中爲分南接淮
徐北齊燕太倉之粟常陳陳此固
人謀補地理亦或天公陰驅社鬼
兼龍神至今廟貌尚巍煥粉墻丹
柱生層雲歲時致祭酬厥德永鎮
此地萬古無崩奔勝代諸公亦從祀

裕民利國垂功勳我舟南歸每瞻仰解纜欲去風
揚塵神豈有意阻歸計但欲直送糧艘達天津我
行雖稽緩不敢生貪嗔

寺前閘

一月到臨清片時過南旺好風颯然來頓助行色
壯樹杪飛輕帆岸脚捲驚浪此水自南流築閘使
北向京運不敢稽死板纜一放時有湖南運銅入
都民船纜得出閘
我來恰及時稽首謝神貺舟人出寺前扣舷發清

唱

仲家淺

自非堂上客不解瑟中聲夫子乃聞過吾儕誰勇
行英靈分岱岳葉梓近昌平千古祠前水猶綠氏
錫名

有陽

南陽闌下放輕舟拂水涼風早弄秋一段清香渾
不辨菱花荷葉滿汀洲

堤上人家屋數椽屋前屋後水稽天遙思秋漲須
浮宅綠柳陰中繫小船

泗水亭

赤帝乘龍西入秦手提三尺掃烽塵新豐市已遷

榆社舊吏亭猶屹泗濱魂魄至今思樂沛風雲自昔護通津我來問渡尋芒屨擊筑悲歌最感人

梁王城

談經會駐雨花臺城築空傳此水隈異日金甌悔無及當時州牧夢俱來像畱寶誌誠何益地有小祠塑梁武及誌公像賦就蘭成最可哀白馬青絲誰召亂古祠遺壘總摧頽

桃源阻雨

急雨桃園鎖孤舟盡日停楚雲高岸黑淮樹遠天青攤飯移吟席澆愁借酒餅何當開晚霽歸路好

揚舲

歸心期旦夕奈此滯留何地界江鄉近天垂雨氣
多溼烟搏草舍殘照上漁蓑且可從流下來朝擬
渡河

次韻酬胡星五見贈之作

望洋驚海瀾射鮒陋井谷達人縱大觀下士拘一
曲胡君洒落姿自幼好奇服佩擷衆芳秀才歷三
餘足已驚天骨聳未改吟鬢綠著書識何裕經世
術尤熟固應效鵬鷖豈復悲櫪伏造物思玉成賢
豪異庸碌智能將益增富貴不相促故遣絕代人

暫依幽居竹買舟出運河水淺拗堂覆石開東湯
湯糧般來續續丁夫勢猙獰客子心畏縮裁詩悶
自排屬和興不獨以我竅鳴蚓引君唾成玉短歌
多促節長吟或連牘是時暑困人無殊籠縛鹿避
毒遠醇醲療饑進糜粥熱風阻晝行蚊雷撓夕宿
微吟行路難聊當步兵哭仰惟古賢達亦或遭俗
目蘇說十不行韓書三未錄況我不能文屢被繩
尺束每隨計吏車未飽侏儒粟年華逐水流世事
笑蠻觸希榮非無術垂老未須勗躬稼亦足寶好
德卽爲福豈能策蹇遊常與肥馬逐棲梁任禿鶩

遠舉慕黃鵠遂賦淵明歸詎待詹尹卜惟君強仕

年益修在中祿百回讀舊書一燈懸老屋學若待

操刀心恐勞折獄壯遊別有時清照藏諸篋壯遊

五小照也余爲處詩囑爲遊子吟却愧中書禿昨宵騰岱雲星

猛雨懸天瀑微涼洗朝氛疾書終尺幅勸緩風雲

懷歸謀甘旨蓄自思言太迂定非人所欲今君喜

有餘高見洵不俗復蒙鉅篇贈直達心源沃從知

孝愛深兼于友誼篤立言豈肯譽過情慚見辱攜

歸挂屏幃光怪照林麓擬欲報瓊琚舌橋待深讀

次韻胡星五喜風

朝陽忽解愁雲溼天地變遷一吹息順風時逆逆
風順北船自南南船北憶昨舟行汶水頭柳林開
浪激寒颼颼聞板十二恰開放順流一擲叨神休
神之施惠有何底相送祇須片帆耳日日停舟繫
柳樁惠我無終徒有始豈知造化抱深心故遣好
風遲至今黃河渡口與相遇擊楫中流送歸去

次韻胡星五天妃閣二首

聞鎖濤聲壯波翻地勢雄陡從千丈落如擘兩峯
通吹鬢疑飛雨驚心歎遇風濺珠千萬斛傾倒老

龍宮

聞以神爲號神來是與非武憑遺廟在穩放萬艘
飛力濟淮黃運聲爭水石磯清江從此去默禱送
將歸

清河禹王臺

夏后排淮日親乘四載來支祈無惡浪明德有遺
臺地迥河聲入庭空夕照開參天雙鐵樹千古戰
風雷

漂母祠

一飯不忘報荒祠終古存何物老女子有眼識王
孫出勝寧爲辱登壇未是恩從來知己感到此每

聲吞

韓侯釣臺

際會不可期風雲起屠釣韓侯未遇時把竿臨滄
溟未教三軍驚先受市人笑誰爲王孫哀徒逢老
母漂釣璜伊何人奇烈比周召披裘隱大澤百世
礪清操丈夫各有懷寧能強同調嗟嗟鍾室誅於
心無悔懊

偶興

輕舟三面闌窗扉雨後涼生枕簟微卧看淮南湖
上樹碧烟疎處透斜暉

肖巖詩鈔

卷九

六

露筋祠

湖風野月掃纖埃古廟高臨劈社開
女子有行妨草露遊人入夜苦蚊雷
心如白璧原無玷履值嘉瓜亦避猜
海岳殘碑猶可讀門前繫纜幾回來

遊康山

對山畱草堂勝槩甲維揚
累石通巖壑疏泉絡屋梁
狀元能救李樂府並稱王
懷古更登眺武功天一方

遊平山堂

紅橋泛艇到危堂萬古雲懷湧蜀岡
煬帝迷樓無

腐草醉翁樂地尙脩篁嵐光隔岸成平遠海色凌
秋入混茫太息劉蘇來已晚賓筵不及共飛觴

登燕子磯

零陵山中石燕子飛入江心掠江水隨風滾浪到
鍾山屹立山根飛不起磯頭亭子高矗天下臨萬
古蛟龍淵有時雷雨颯然至怒濤直蹴金焦巔沙
岸蘆洲辨瓜步風波如此公無渡設險徒憑天塹
深橫江鐵鎖寧爲固自從萬斛下龍驤南北何會
限此疆獨立危磯展清眺六朝金粉送斜陽

太白樓

醜酒危樓上臨風一慨然楚江自秋月蜀道隔青
天空抱賈生涕獨逢開寶年愁來吟樂府徒倚翠
螺烟

三元洞

高蟠石插天俯瞰波撼地誰鑿江上巖巧構巖隙
寺揚帆望屢牽杖策行一至危逕緣秋臺幽洞穿
古隧入門踏潛鱗登樓接翔翅探勝快憑臨履險
防失墜長空捲怒濤萬壑振涼吹鸛鶴亂飛號魚
龍恣騰沸紛紜耳目炫顛倒夢魂悸何事温太真
燃犀窮鬼魅

虞雍公祠

牛渚磯頭幾戰爭，雍公祠廟未淪傾。
共知門下收桃李，誰信胸中貯甲兵。
江上投鞭千武騎，軍前揮扇一儒生。
若教破敵非吾事，立馬吳山畫竟成。

舟行灘中作

我舟行運河，牖門晝閉高嵯峨。
十里五里一停泊，困眠長日增沉疴。
我舟行大江，張帆快似騰驪駒。
長鯨巨鼉一掀舞，性命頃刻隨奔瀧。
涉濟踰淮亂汶水，一水一厄半生死。
歷盡危途北自南，纔覺涇川尺餘咫。
馬頭磯上山層層，釣魚灘下石齒齒。
石

勢不堪橫作劍溪流那得直如矢我舟泝流避石
稜如從十八灘中行危灘益上益奔峭舉篙牽纜
諧衆聲循途旋折毫髮較有時直上風霆爭欲前
寸進懷縛馬却後一失韉脫鷹我時困似坐園土
僕指還家程可數三千里少百里多一步未終漫
貽阻回視舟行落日間濺珠跳沫高于山嗟嗟末
路何其艱

到家

遊人小逕獨欣奔雀噪雞棲恰入門豈以田園歸
栗里庶同饑渴返羗村三千餘路屢爲客四十九

年今抱孫老矣塵途誰向說一杯聊自慰離魂

記得從前罷耗還上堂長跪奉嚴顏吁嗟行役聲
猶在痛念劬勞涕自潛千卷塵封悲手澤一燈夜
坐掩柴關男兒不捧毛生檄枉作書蟬兩鬢班

自搜做篋換征衣準擬而今永息機入世未知何

日是回頭真悔昨年非

予於今春
五月初度

病拋鄉里情誰

遣夢遠池塘句亦稀莫道還家少歡趣已聞攜榼
扣柴扉

除夕

年年春去復春來此夕曾經五十回祇有今年除

夕好屠蘇數舉異鄉杯

借讀長春古刹

廣陌輪蹄紛襍遯做廬兒女苦啼號出門祇愛尋
孤鶴涉世誰能識二豪雲裏一燈仙梵靜雨中雙
屐亂峯高分將竹榻容軒卧苦茗醺人勝濁醪

贈法政和尚

溪光山色抱重垣借榻都忘寂與喧才短我知無
用用道存師有不言言閒堦風定鴉棲樹永夜花
明月滿軒自悔年來奔走苦安心試叩老祇園

復齋歎

高齋額以復爲名義取剝盡還陽生如何碩果竟
終食天地之心無可憑嗟嗟此齋卓立巧巖頂乃
是吾弟舌耕心織之所營布金豈肯佞木佛卧病
聊欲逃浮榮終朝兀坐誦經史有時散步招山僧
我常浪跡苦奔走歸則載酒歡合并園中草木作
詩和山頭風雨聯牀聽可憐一朝被病遂綿惛令
我垂老悲惛惛還家漠然少生趣攜具復此棲禪
扁虛室悲風自騷屑苔階履跡猶分明更無人掃
延客榻或有鼠竄藏書櫺夢中池草尙春色覺來
斷雁淒餘聲子敬人琴痛長往坡公邱墓將誰銘

吁嗟乎此生此世了不復忍看孽窠懸空庭
額上
大字云起
所手書

戲題蕉葉

萬林廣種僧家紙千葉新抽學士心
偃月堂中寧有此頭銜空自署清陰

次韻胡宏峯自嘲襍詩四首

才華折時命此言誠不虛拾橡隨狙公
佩囊騎距
蹶下筆摘星宿奔走窮崎嶇身與名俱泰
古暨今
所無先生富多文弱冠能搏扶作賓遊
上國推
轂傾當塗高第擢可必貧病來與俱
半死痛桐樹

二毛怯方諸作詩吟折臂用自嘲腐儒

元峯抱風疾左體不

仁者十餘年

處世不嫌拙著書誰見長捫心誠有得卧疴亦何傷
小人多戚戚達者仍常常焉用心自警翻使身爲戕
造物生萬輩官體列成行豈有比肩民如鳥並翼
翔飲食安其質戲遊免于殃彼皆形骸具孰保知能
良遇事神輒躓貌人心乃狼何如抱貞疾冰淵矢弗
忘漫作半人笑卽此長生方

箠仕苦折腰說經喜揚眉師資及後學焉用司鐸

爲元峯曾任廬江上元廣文以疾罷官偶抱維摩疾歸下董子帷遂

扶聖經與大義昭可知百家及外史口吟兼手披

秉炬漆室朗惜陰冬日遲清談成隻麈絕妙如色

絲

元峯著有春秋集傳及隻麈錄

萬卷共堆案一手能堅持卽此

著述勤何曾精力虧元神靜頤養啓蟄當有時元峯

抱疾改號

鬻夫故云

憶昔親道範戰藝遊京都引我爲忘年餐我以詩

腴昨從直北歸復與才子俱出圖索題咏握管忘

迂愚

癸夏與元峯令嗣星五買舟南歸星五出壯遊圖屬題

不覺字盈幅可

笑膽滿軀先生肯屬和令我增感吁生年垂龍鍾

與世常齟齬偶發蚓竅鳴聊佐雞窻糊得詩謬青

目百讀學僧跌竊窺宏獎心寧與林宗殊安得相
從遊醉飲日歡呼

凸泉

獨歷千盤盡依然一勺多飛騰通竹筧曲折裊烟
蘿憶自名初錫會同醉後歌泉出巖頂雲起名之
曰凸爲作長歌予和
之池塘春夢斷逝者痛如何

和若顛和尚過長春菴原韻

矯首池陽隔暮霞欲尋杯渡興空賒若顛住持池
州府石埭縣

杯渡菴約遊九華時過之到門忽駐雲僧錫滿座紛飛鹿女花

苦學風餐無慧業悟通水鏡有詩家何時撒手從

君去九子峯頭夜煮茶

悟空上人五旬初度

無端彈指廿餘年

歲癸巳遊平頂山得交上人迄今二十二年

物外光

陰亦逝川問訊前遊山好在忽逢老宿鬢蒼然蘭

心有客稱同臭

上人舊從胡海南學西蘭

海角從君借一編上人

近精堪輿之學絕谷鼓巖飛錫遍柴門新見地行仙

送張滙南遊漢口

昔我先大夫于世無所求獨愛書與畫不惜傾囊
收偶然遇張子謂是今僧繇館之城南寺屢日恣
淹留畫筆時一作萬象工冥搜盈卷簇林壑什襲

珍環球臨行贈以言欲令名遠流揭來十五載歲
月如浮漚俗情與古異有能愛此不慘澹良獨苦
婁貧不堪憂乃翁有至樂色養無珍羞所苦衰疾
迫欲爲甘旨謀過我言遠別開春買輕舟漢陽樹
蒼蒼江之水悠悠讀賦尋赤壁弔衡凌荒洲此行
頗不惡何嫌暫依劉我欲捐俗累裹糧從之遊放
眼得江山下筆開深幽惜哉困醢雞允矣負海鷗
臨岐懷永好作詩申綢繆

題族曾祖淵叟公遺像

我祖汴遷涇澤流涇川水清白吏遺風詩書世濟

美分派數雲仍積德歷星紀往往得異才時時躋
巍仕澗叟值嘉會亦歌鹿鳴起筮仕令上杭閭閻
誦樂只治民繩巫蠱妖書盡爲燬治寇殲渠魁脅
從釋下死報最方佐郡解組如脫屣薄田供餽粥
遺書課孫子才未驥足馳名應循吏齒邑乘可披
尋私心勤仰止況瞻遺像在如從親炙似睂宇豁
疎爽衣冠失華侈作詩示後人奮志法前軌慎毋
忘本源不在拾青紫

畱別蓮社和尙

又向溪橋別遠公浮雲去住苦難同一羣人影隨

流水千里鞭絲颺曉風

時予將赴公車

林壑僧稱無上士

關山客作可憐蟲不須後夜他鄉夢回首樓臺夕

照空

與朱錫三北遊

前年我踏京華路苦口君曾勸歸去今年我卧青
峯頭抵掌君來勸出遊遠遊不惜衝塵袂馬齒堪
悲從道長三年一萬一千里昔何旋反今何往君
云往反固其宜久客他鄉須一歸歸來松菊翳荒
徑遽遭風雨摧荆枝若使遊踪戀京關夢中骨肉
無由訣兩地安知哀樂殊異時空使肝腸裂燎鬚

炙臂亦徒然草斷池枯隔九原待死真宜誓先墓
隨羣豈復趨長安長安天子高五泰新布綸
音周內外繼聖雙瞻日月懸望恩共慶風雲
會相約新春整旅裝人生得失順其常微之固有
人琴痛羯也寧因封末亡便擬一車租兩蹇與君
好作同功繭相送岐途更有誰哀鴻聲與寒雲斷

寓慈雲禪院

強顏猶逐隊作客且隨緣夙喜皈依佛新瞻尺五

天

禪院在
內城

到門春水活遮道古槐圓一榻香臺畔

清宵自在眠

勝國遺蘭若巖城近棘闌風簷仍不免丈室暫如
歸佛火分殘夜經奩倚破扉春光愁夢裏未見一
花飛

題李勉齋山居四時圖

春山媚遲日夏山招遠薰秋山瀟空碧冬山生凍
雲居山識山趣隨時多所欣鑿崖通畧徇繞屋排
松筠天桃乍開落雪霰隨續紛攬物窺變態下筆
思入神密林井西作小篆黃鶴皴調鉛與殺粉能
事兼公麟我生山水窟屢寄京華春閉戶僕爲僧
出門風揚塵書畫偶相對耳目時一新去去策歸

蹇永結猿鶴隣

歸懷

借計都門九往還風塵贏得髮毛斑年來下第成
常事老去題名轉厚顏紫陌看花懷舊侶清宵聽
雨夢家山已拚三紙書驢券歸結茅廬水石間

把卷窮年對短檠空嗟老大百難成承恩近許

依清切識字籠能記姓名

內閣書簽必以細字自署名于紙背病眼

欲迷雞省霧歸心還借硯田耕腐儒得飽無餘事
惟可題詩詠太平

祝汪九梧舟農部四旬初度卽題其秋山讀

易小照

禮云四十強而仕學古服官從此始汪君風望重

朝端十載前曾稱版使我從小阮飲香名

姪孫高為梧舟

西席

賓久識濟南有奇士策蹇京華得論交益從談

笑窺涯涘虛亭六月荷風薰開筵折簡招故人彈

棋說劍肆論文郁厨絡繹來殊珍酒肉山堆滿堂

醉快如河朔銷炎氛飲罷張燈出清照長康畫筆

稱神妙尺幅明湖與鵲山高入棕履兼桐帽尋詩

興已入秋空讀易心能窺道與此圖筆工意未工

如君豈宜邱壑中間年况值壯行日造物勞人未

能逸古人詩咏膂力剛何曾泉石恣徜徉秋鷹振
翮華峯迥赤驥追風 皇路長君才妙與宋韋伍
已見盛名題漢柱國士能膺 特達知行看曳履
登丹堦否則分藩亦足持旌麾焉用邱園勞夢思
閉戶著書雖可樂畱待他年娛老東山詩

和友人招賞盆桂二首元韻

得秋最冽是幽燕祇許東籬傲骨堅豈意碧滋千
里至竟教金粟兩株全根應屈曲如穿月臭不差
池互友仙把酒花前同一醉主人費盡畫叉錢
一枝不逐李桃春直待秋光次第新種自炎洲遷

未易花來北地少，彌珍高情招與遊。
香國倦眼開如見，故人比似君身有仙骨。
清詩掃盡九衢塵。

長新店題壁

亦知且住爲佳耳，其奈長居不易何。
旅店三間容信宿，夜深夢繞小黃河。

過德州

擊柝殷山城短牆，雞一鳴裝頻催遠道。
夢欲續餘醜寒月，馬頭墮斷槎波面橫。
重邱齊地近回首望燕京。

曉行口占

又逢秋思促歸鞍敢戀中宵伏枕安
撇我無情悲隙景
侵入到骨畏新寒
馬蹄響踏濃霜碎
客鬢光浮曉霧攢
挾纊應須謀一醉
酒旗風颺出林端

渡江

多情風利送將歸
蘆荻蕭蕭一葉飛
萬里江流鷗浩蕩
六朝山色翠依依
微濟川才自慙
蘭楫策蹇塵空化
素衣爲報長安同學者
把竿吾欲老漁磯

過潤州訪韋堂卽次贈詩原韻

欲尋鐵甕吟詩處
尙記金臺約伴初
便向鱸堂分半榻
勝從馬廐曳長裾
卞和漫泣三遭刖
蘇季曾

經十上書予赴公車者九次誰抱高文終冷署漢廷有待

用相如

贈韋堂

日精學舍小于舟學署在日精山下人道先生似子出關

地新鋤經史圃升堂如入鳳麟洲堂有麟鳳二圖石碑置諸壁間

士無讀律心知向僧爲能詩社見收祇此閒官名不滅南徐萬古大江流

吳烈婦錢氏詩

延陵老友不幸喪良子子有賢婦曰錢氏氏痛其夫好學而早夭不忍獨生願同死氏年十五賦于

歸良人抱疾形素羸自從計偕北上返舟淮水湄
疾日益劇紛延醫氏躬侍湯藥朝不甘食暮不得
解衣不食不寢歷有三寒燠疾如可起願身贖天
翁不肯憐鬼伯太催促鏡折釵分一朝失所天已
許魂歸泰山籙聳身欲投階下死拚將血濺苔花
紫旁人勸諭千百端涕陽爲收心自矢上堂拜舅
姑幸未臨暮齒昆季如媿俱能賢晨羞夕膳應不
缺甘旨兒今失夫無主後寒食清明誰載酒螟蛉
式穀誠有人一棺便擬連雙阜從茲絕粒踰數朝
白日欲墮蒼天高閉戶無人聲寂寥孤燈挂壁耿

寒宵素練三尺命已拋海枯石爛心不彫身姑啓

視失人色舉家大小相對聲悲號是時孝廉之師

撫江左官閣遙聞淚暗墮

朱石君先生爲烈婦作傳且請旌

烈欲表

貞烈旌其閭請諸天子制曰可幽光潛德得闡

揚孝廉未死氏未亡人生貴賤壽夭卒同盡惟期

名氏能流千古芳嗚呼果使名流千古芳廡博之

葬夫何傷

爲胡黃海廣文題贖詩圖卽送之維揚

蘇湖教授見何遲未見經義先見詩詩在長安故

人宅

謂翟立齋侍御

清句居然壓元白讀來三載託神交

變而不見心徒勞天教秉鐸來涇邑聽講諸生槐
市立忽然別我遊維揚東閣老梅待洗妝臨行出

圖索題句圖中烟柳邗江路繡衣使者特相招

圖爲

前年謝侍御招遊維揚而作

朱軒畫舸行遙遙貧交相送賦愁

絕一度題詩一度別人生會少離苦多安得載酒
時經過他年待君金馬署看賦神明與馭娑

早春之丁溪山中天氣和煖花柳粲然次口

大雪酷寒用東坡江上值雪詩韻

不須衍策兼灼龜但推物理能先知畫觀礎潤知
雨作夜窺月暈知風吹如何大雪出不意頓令寒

液凝霜鬢新年屈指過人日凍塗早滌無流澌扶
杖入山縱幽探已覺翠色連雲危野田薺麥競舒
秀沙汀楊柳將抽絲東皇鼓鑄暗有力物態流轉
會何爲但見輕紅淺綠滿坑谷導我行路不藉人
扶持直前鼓勇騁腰脚卓午流汗沾膚肌豈知寒
燠祇一翻覆手造化顛倒戲小兒催落白日作飛
雪灑空飄瓦會不需少時缺月朦朧隱牕紙朔風
掀簾侵屏幃不愁衾枕潑寒水祇恐施桃梅杏摧
芳姿曉起開門窺瓌瑳凍合厚地無滲滴懸溜巖
凝挂檐板瘦石滑澁連堵墀奈此酷寒侵骨折憾

無敝裘故絮隨身披山中幸有老昆弟

謂篋音四弟 聯

床卧聽鐵馬風前馳起撥地爐燒東葦行沾濁酒
傾于卮乃知天工變幻不易測人間苦樂還相隨
試看入春三白田公笑縱教脫髯墮耳吾甘之

將遊漢陽舟中偶作

作客苦思歸居家厭聞鬧將爲漢陽行遂買鳩茲
棹大江動地來萬馬共騰越遙看水上帆直似風
中蘼掀顛困難支性命危可悼誰令涉艱虞意欲
從好樂臨江聳樓閣放眼試登眺招手雲中仙跨
鶴爲前導

江上

江面雲欲飛渡頭雨初歇不知春漲高但覺沙痕
沒

天橫鄂渚遙日上鳩江曙烟水共青蒼挂帆從此
去

飛絮攪羈愁隨風渡江水何如江上漁祇在此江
裏

安慶

依然八卦壯金湯楚尾吳頭此一方幾處樓臺環
曉郭半江烟雨鎖垂楊射蛟浦在雄風寂獻壽盃

空翠影長招得皖公來小艇客中無用問滄乘

小孤山

大孤山下小孤山皖口西來見翠鬟地湧一峯成
砥柱江連九派撼孱顏崇巖日暖魚龍動古木風
平鶴鶴還安得輕舟維石畔枯藤挂到海門關

阻風

馬當山頭雲黯黯馬當山下雨濛濛山神應憾闕
公去不助行人一葉風

琵琶亭

白傅吟詩處琵琶尚有亭一時新斬棘

舊亭早陋
近新修拓

而大千里恰揚舲水接漢江綠山招廬阜青晚來
商婦曲嘔嘶不堪聽

烟柳翠交加長隄一道斜未能逢使節相與泛仙

槎

謂樵使瀛陽唐公

慷慨常懷古飄零且看花非無司馬

淚不肯灑琵琶

舟中望匡廬

我舟至湖口匡廬側欲成孤峯我舟泊潯陽匡廬
橫似張屏風舟行隨水有轉側到處都與名山逢
山靈與我情何厚故教變態生無窮峭壁朝開日
晃蕩飛泉夕與雲溟濛不知香爐五老面目果何

似但覺林巒出沒騰青空大江九派流浩浩客子
千里行匆匆恨無石尤阻萍跡回頭顧揖金芙蓉
何時裹糧訪遠公二林歷盡西與東探奇亦似樂
天翁獨尋雲水泉石最勝處往置草堂半畝于其
中

赤壁

黃州赤壁小於拳攬勝何人放酒船客似大蘇從
古少山因兩賦至今傳洞簫明月情多怨孤鶴橫
江夢欲仙愧我匆匆帆去疾望中樓閣隔雲烟

晴川閣

晴川傑閣矗嶙峋有客尋奇問水濱
歷亂風帆飛葉葉參差烟瓦蹙鱗鱗
千家花柳春如許萬古朝宗蹟未湮
登眺獨懷明德遠魚頭應不到遺民

黃鶴樓

泛艇來登黃鶴磯磯頭跨鶴昔人非
漢南勝地容吾到海內危樓似此稀
水導岷源天際下雲移大別鏡中飛
明知崔顥題詩在不忍無詩對夕暉

仙棗亭

我聞安期生食棗大如瓜神山不可到
來泛江漢植水邊黃鶴磯樓臺仙所家
中有太古樹老幹橫

槎枒蒼皮剝既盡白骨堅無瑕危亭旁點綴怪石
環周遮想當手植時結實燦流霞驂鸞集羣仙列
晏充肯嘉殷勤語地主呵護煩枳桞駕鶴仙復至
此樹憲重花

伯牙臺

伯牙不可作勝地且扶筇灑灑水循砌泠泠風入
松亭臺絢金碧士女競昌丰千載琴聲寂惟聞日
暮鐘

南浦兄買牡丹索詩

莫教黯澹負芳晨來訪江頭抱甕人三月節臨元

已日一盆花買洛陽春色香豈必空諸界富貴何
會惹點塵好把清樽酬絕艷烟籠露壓幾枝新

後湖

茲湖介三邑其大敵漢廣經冬殺洪潦厥地成沃
壤居人植二麥層雲翻泱泱間以芥與菘風葉相
俯仰我來值春暮遲日飛塵埃遠墩浮似螺碧草
平如掌湖心蘊危亭遊目發遐想魏武昔南征此
地資牧養萬竈共歡騰一炬喪精爽山川自依然
英風竟安往

漢鎮雜詩

面帶晴川背枕湖人聲鼎沸市烟鋪居奇坐販知
多少儘得腰纏十萬無

東西南北此爭趨旅館隨鄉各一區收得後湖花

月好別窓有客坐天都

天都巷名新安賈會館也

禹王閣下蕩輕舟直到龜山絕頂遊極目浪花紛

出沒雙飛燕子剪江流

雙飛燕舟名

士女乘春共往探湖心亭外柳毵毵誰知解珮相
遺處漢廣曾經咏二南

黃鶴磯頭烟漠漠白鷗江上雨冥冥春來作客愁

何限羨爾仙人睡未醒

仙棗亭後有呂仙睡象

肖巖詩鈔卷十

涇上趙良爵離徵甫茗

登大別山頂放歌

禹貢導水先導山山勢東注隨奔川江漢吳源下

流合合處乃有大別屹立于其間我舟派涇復沿

漢開窻早得窺烟鬢猶疑可望不可卽亦如海上

三峯風引還哲兄導我去謂南浦去去凌孱顏敢云

腰脚懶不復窮躋攀晴川閣下聊小憩响屨遺蹟

得諦觀讀碑已知明德遠展眺未極江天寬尋途

鬱屈陟其冢俯視山澤城郭一氣相縈盤魚鱗蹙

蹙迷萬瓦蚊雷隱隱轟千廬南樓

樓名

秋興

亭名

杳何

許祇有黃鶴對峙倒影江中懸山頭有古寺望遠
何蒼然坐覺岷嶓天際下直送奔流萬里屯荒烟
安得乘槎似張騫親爲四瀆探其源不然讀書浪
說是宿海足跡未出門庭前焉知刊木奠山有遺
烈令我不得爲魚與鼃

重遊黃鶴樓

出門無地可行遊又上江邊黃鶴樓懷古每嫌身
世窄登高頓覺水天浮洲名鸚鵡知才累笛落梅
花赴旅愁風景猶存仙跡杳憑欄誰與暢勾留

如此江山如此樓登臨不奈異鄉愁
饑來驅我付行乞老去依人悔
遠遊動地風行披古樹兼天浪
湧沒輕鷗三湘無限傷春意
直欲攜家上釣舟

武昌聞盜

大江環抱鄂王城城上危樓聳太清
千里荆襄通指顧一時豺虎劇縱橫
恭逢廊廟誕敷德痛憤潢池竊弄兵
草薶禽殲無可奈急除荒穢勸春耕
樂利年年詠太平陡聞鼙鼓夢魂驚
妖狐敢樹韓童幟義士方搏趙彥兵
應識九重悲玉石須憑一劍掃機槍
風煙極望通秦豫憤切終軍欲請纓

留別南浦二兄

與君不共返柴門世網拘牽莫比論萍跡久疎童
穉好天涯暫挹笑言溫萬重雲樹潯陽棹一片風
花漢水樽黃雀樓前聞玉笛登臨相送各消魂

舟中望武昌諸山

日暖山意濃風輕江浪軟江山能留人舟行故稽
緩前途指武昌中流望青巘欲尋漫叟樽遠上吳
王峴探梅詎乏詩載酒苦無伴安得如坡公蜀士
供游衍

能仁寺

征帆指潯陽曉日開江郭極目見浮圖乘興訪蘭
若古寺誰所營遊人履交錯入門繞松篁濃翠抱
樓閣怪石飛不起危梁懸欲落寺有石似船云飛
來者有大梁以鐵
釘懸深堂貯井泉寒光上佛脚雖爲城市居要有
山林樂安得懇維摩於此許棲託徘徊覓歸途疎
鐘流野壑

泊琵琶亭

開春來泛潯陽棹琵琶亭上容登眺天桃楊柳各
弄姿彷彿舟中商婦貌銀粉爲牆竹織籬栽花壘
石映清池別有樓臺鎖金碧官舍不許閒人窺歸

舟又向亭前泊落日長江烟漠漠杳無秋月照淒
清何處哀絃歎離索離人思婦古同情假事抒懷
鳴不平白傅自流遷客淚琵琶原屬子虛聲後人
但愛詩詞綺便向江邊築亭子盃底收來溢浦濤
樓頭招得廬峯紫江山風月無終窮誰似瀋陽權
使公繞壁每搜遊客句愛才真有古人風祇今豈
無詞賦手一詠一觴復何有林園但見旌麾來花
徑紛從輿隸走日日江頭勞送迎香山地下應撫
膺悔將謫宦翻新曲留與居官作驛亭

阻風

大江東下阻歸橈一醉懣騰暮復朝客裏不知春
已去柳花吹盡短長條

江豚吹浪浮還沒沙鳥迎人集復翔祇有皖公能
愛客口從盃底卧青蒼

華陽鎮謁方公祠

公爲前明四川都司斷事
靖難時川進降表不肯署

名被逮至華陽鎮作
絕命詩自沉于江

靖難師來廟社淪天邊忠憤獨微臣僉名降表羞
陳款絕命危辭誓殺身十族已拚歸正學

公爲正
學鄉貢

弟三湘應共泣靈均大雷古戍荒祠在得闡幽潛
待後人

舟中望九華山

奇秀如分太華峯插天九朶削芙蓉山宜橫側層
層看風自西南面面逢積氣遠迷雲外翠臨江倒
濯鏡中容裹糧何日招仙客千丈高頭七尺筇

順風至荻港

華陽三日繫輕舟吹面風來是石郵忽見檣頭旗
脚轉萬重山已失舒州

泊荻港

清江萬里拍天浮小港分將一勺流潮汐恰能隨
候至帆檣多爲避風收暮烟人語趨津市夜月烏

啼上戍樓板子磯頭燐火亂直教懷古劇生愁

食鱒魚

巨口鱒魚縮項鰻衆魚孰占此魚先未能結網臨
淵羨忽見登盤出水鮮細骨漫愁成箭鏃銀鱗且
喜作花翎奇珍不入天厨貢驛騎休吟大復篇

與姪南田再姪夏宗夜坐

酷熱謝人事喘汗不得蘇向晚生微涼步月城東
隅背城有別墅二阮之所居閒徑待良友煮茗臨
前除雜坐暑少長深談摘詩書有時言俱忘默爾
心相於好風自遠來吹我襟與裾叢花一掩抑重

露相沾濡玩物遣塵慮迎爽清垢膚夜久各歸寢
夢遊天地初

宣州

畫裏江城路童時策蹇遊卅年成闕別此日復淹
留芳草都官閣叢山小謝樓依然登眺處如見故
人不

昔去悲離索今來感死生荒墳多宿草朱鎮西于庚子歲同

遊京都別後遂作古人遠道隔層城朱聖模時赴旌邑爲人書屏腹痛言

成讖饑驅筆代耕昭亭空自好相對萬愁并

敬亭書院訪汪自占同年

四十年來老弟昆
東西南北路分奔
每傷遠別催
雙鬢暫得相逢把
一樽句曲水明花
繞席敬亭山
好月當門書堂勝
地人師在憾不常
從說魯論

張惺齋招飲

昔日趨西阪登堂拜德公

惺齋尊人相國先生舊居西阪

重逢君

子謙猶見古人風
坐久花移席樽殘
月滿空出門
尋草徑不與舊時同

題果仲上人詩集後

瘦權癩可竟安之
此日江城見果師
別後八年成

老宿

己酉秋上人訪予于幕山天竺寺談論終夕且約他日來主水西方丈

袖中一

肖巖詩鈔卷十

卷出新詩吳山越水行俱遍釋典儒書印不疑却

讀碧雲清怨句夜臺愈抱故人悲

集中屢及亡友朱鎮西

因樹軒開積翠間
新秋殘暑阻躋攀
讀詩知爾烟霞癖
見面憐余老病孱
雙屐曾經雲外寺
一燈待主水西山
何時得遂裴休約
晏坐相從靜閉關

贈張惺齋

都官已遠愚山死
柏園健筆相繼起
二十年來失典型
風雅復歸張公子
自從弱冠登驪壇
早有香名貫人耳
愧我遠遊求友生
轉使近交遺彼美
偶然租蹇入江城
忽蒙枉駕來旅邸
人中師表幸遇

黃天半龍門願千李主人好客罄交歡掃徑開筵

設芳醴插架藏書出羽陵連顰老友多黃綺

謂汪山長

占自是時梧葉初報秋落日涼風動窻几參差樹杪

疊嶂雲屈折簷前宛溪水羨君卜築占林泉到處

搜奇歸杖履君家阿翁官半刺阿兄簪筆稱柱史

若教成事肯因人豈有棲遲尙蓬累而今大吏奉

鶴書已舉獨行上

丹旻

宣城嚴明府以惺齋應孝廉方正

從來

執躬冰玉中未免作吏風塵裏 朝廷定欲徵賢

能丈夫豈宜終耒耜但願功成早拂衣名山著述

歸休矣

道上口占

平遠山綿百里青
看山隨意去還停
閑情差與童時異
風雨匆匆過敬亭

野色迎人引興濃
肩輿歸去嶺重重
前途合遇琴高否
落日荒烟自一峯

寶峯書院司事諸公招閱院課作此代柬

入世竊浮名
返躬怯實課
揚揚昨暮兒
豈勝窮措大一朝
主文衡黜陟相弔賀
余本迂以愚學不勤而惰
插架書尙存
把卷讀未破
偶然從友教
特用救寒餓
抗顏不勝慙
耕舌苦無奈
寶巖開講院
先

君主臯座弟子盡英豪晨夕共切磋經戒鹵莽求
文洗脂粉澆維時凜面牆趨庭敢休卧歲月遽遷
流身世如轉磨每苦憂患纏遂多離索過遠道屢
奔馳壯懷愈摧挫題名事倖成戰藝氣先慙邑西
素多才競爽非一箇風雲入毫端珠玉生咳唾何
異大羅天羣仙相唱和月旦評誠難日色迷則那
折簡招論文父兄無乃左

中村遇李乾圃

論文昔共峯頭席把酒今聯客裏床清話不嫌終
日夜離憂已積廿星霜老綠兒女猶耕舌苦歷風

塵始戀鄉擬結桃花潭上屋從君十畝課耕桑

爲李乾圃題坐石垂釣圖

澄潭水漲桃花春潭中鱖鱖遊錦鱗安得一網殲
厥羣幽人踞石垂釣綸得魚作鱠嘗鮮新不得亦
足怡其神何會後車慕涓濱亦非羊裘稱隱淪我
自適我無貪嗔前山風雨生黃昏烟簑歸去閉柴
門孤燈兀坐搜典墳畫圖一幅傳高情觀者苦未
知平生噫嘻乎是乃吾友李君普其名

過蘇嶺

老懶行難逐採樵一峯陡起插層霄人臨曲磴盤

雲髻路轉危亭出樹腰
丈室烹茶供憩息
長風吹袂颯颯回頭却顧來時徑
直墮蒼烟下界遙

重遊寶峯

造物雕鏤闢寶山
古來知閱幾人攀
烟雲于我供揮灑
杖履當年待往還
幸不桃花迷洞口
憾無芝草駐童顏
紅泉翠壁依然在
蠟屐重登力已孱

廿五年前留別詩
詩中戲取晉文詞
無心一語偏

成識有約重來恰及期

前詩有待我二十五年之句自辛卯至丙辰適周其

數水灘雙泉欣劍合
雲埋九子憾花遲
人生歲月

寧能待尙記高桐手植時

院前雙樹先君所命種者今數圍矣

蒲院松筠各向榮當時覘土費經營固宜石室祠

先子書院司事諸公擬祀先君子朱子嗣旁直展春風被後生絳帳

台泉懷相國辦香西水拜文成寶巖亦有臯比座

邑乘還應並著名

齋名弗措憶趨庭擘窠重瞻雨涕零弗措齋額先君所手書

另換一番人作伴誰同九載夜橫經書于齋中者

凡九年凡九多愁鬢髮增新白無恙溪山祇舊青慙愧文

場待題品風塵久已窒心靈

入山我已愧掄材山下紛紛橐筆來豈有爭名關

得失居然鎖院戰風雷是日來應課者三百餘人院中幾不能容父兄

教比周鄉老子弟文成漢茂才善始還須圖善後

十年種樹益栽培

諸公議于院之兩旁增立號舍予爲作序勸諭

半月山居喜靜便擬將耕舌度餘年論文細待清

尊把送別愁從俗網牽一水州雲初返棹長途風

雪又揚鞭

時將于臘初北上

武陵終在人間世他日歸棲

定有緣

過漆林渡望藍山

落日促歸心輕舟過漆林未能逢太白相與陟藍

岑嶺色極天遠雲根穿水深欲尋灘響處活潑洗

憂襟

活潑灘在太白放歌臺下

北遊示兒子如圭

我初赴公車汝方在襁褓蹉跎廿五年汝壯我垂
老既老則宜安胡忽馳遠道若爲富貴謀已知來
日少或爲民物念問心何時了以此寡營求出入
任懷抱偶然竊升斗未忍慕枯槁人生有十等至
賤如與皂亦各有其營未能貪素飽念我祖父來
耕讀以爲寶薄田供饘粥遺書足搜討但能號通
儒何必遊壁沼肄業汝多紛履榮我讓巧三載賦
歸田舊學爲汝考

阻風遊燕子磯

天公一噫滯行舟百丈危磯振策遊樹裏人憑飛
翰立樽前江入大荒流每嗟飲馬臨瓜步誰道蟠
龍壯石頭莫問六朝金粉地好山且與暢勾留

遊上台洞

大江向東流羣山自西控山勢亘作屏誰爲鑿成
洞石旣透深堅雲不彌闕空或豁如牖戶或穿若
飯甕或密若蜂房或裂如瓦縫廣大者上台樓託
聚禪衆壑谷成殿庭懸崖仰併幪前惟樹墻垣內
不架楹棟入門勢陰森白晝氣昏霧參差懸石筍
涓滴垂乳潼瓦盆貯旣平汲綆閒不用能資茗飲

需廣設佛天供是時月嘉平二麥宿耕種老僧樂
清閒殘經默吟諷林空清磬流日暮寒鳥唳雖不
名洞天已足避喧闐喜我艤舟來於此遊日縱明
朝馳塵途添入江鄉夢

山行

旅夢斷征鞍朝暉開遠巒馬蹄踏山脊人影上林
端髭以霜花磔心因石角寒垂堂思古語行路洵
爲難

贈店主人周某

用姪雷
生韻

碌碌場中荷蓀翁少年猿臂學從戎一官不易歸

田樂三尺寧誇蓋世雄
車挽鹿門猶有伴
襄期馬革竟何功
我來止宿陳
雞黍想見春秋隱者風

過秦山作

我夢遊岱嶽醒來墮烟霧
計里隔三千何時騁飛步
偶然驅車向秦安一峯
突兀撐青天
昨朝今朝橫側看
山容變滅紛無端
所惜嚴冬風色寒
層冰磊砢迷千盤
天門日觀苦難陟
但見歸飛幾片排雲翰
從來五嶽三公視
東巡望秩自虞始
七十二君皆子虛
仲言特過桓心侈
何乃秦皇漢武流
不信儒書信方士
築壇崇祀失升中
採藥求仙貪不

死前人多被後人嗤登山弔古吟新詩題名勒石
遍崖谷山靈亦似遭瘡痍我願爲山完太璞遠逃
須倩愚公移不則倒捲東海作風雨淨洗氛垢祇
留無字碑此意誰從遊客語舉鞭顧揖匆匆去

呈文芝厓夫子

少壯蹉跎老自憐衰慵無力着先鞭肯從世味尋
眞樂差幸師門出大賢山斗以崇韓子望泥塗半
屬絳人年霽年五十二矣同門巢縣陸梓獨慚樗
散非桃李鍼芥相投豈偶然官年四十八其實猶長于霽也

送李隨園同年扈 駕盤山

葡門北望鬱蒼蒼
扈駕巡春夙戒裝
雲擁屬車瞻豹尾
山盤磴道走羊腸
扶輿氣淑鍾陵寢
聖主情深捧豆觴
不似漢家從校獵
故人無用賦長楊

李隨園歸自盤山

盤山攬勝踏龍蟠
應自中盤到上盤
出驗正懸泉疊疊
羣成三五石攢攢
津亭花柳迎人綻
古塞風雲立馬看
扈從歸來薇省聚
笑談爲我繪林巒

胡澹溪五月初度

翠舂亭上遠山橫
遙指天都盡太清
定有人傳軒

帝訣海雲深處學長生

爲友人題張杲攜家歸隱圖

仙人非世情脫屣棄妻子翱游洲島間跡不履城
市豈有車與徒擾擾如蜂蟻銀青張大夫能疊驢
作紙韓開頃刻花劉唾盤中鯉何物驚籠生吐納
多譎詭美人與嬌嬰想皆由幻技畫師固知之粧
點良有以末俗慕東方大隱從祿仕以彼金馬門
何似中條裏風雲徒擾懷泉石川娛耳余亦白頭
翁攜家長往矣

題畫

閒雲任放一峯出野水會同諸澗流祇有江鄉牢
記憶夜深風雨夢扁舟

汪九楮舟爲鑄小印見贈詩以謝之

鑄銅何似搜石穴印史流傳數松雪文何以後作
者難望古冰斯誰顏頡汪侯聲譽重京華書畫詩
兼鄭三絕篆刻非學隨意爲筆力所到瓏瓊屑陽
朱陰白苦分明左屈右蟠妙古拙拙處如觀蟲鳥
紋古意不嫌風雨齧平生嗜此廣搜羅有得愈貪
如老養花乳凍玉每隨遊何人爲我募獵碣琉璃
開厥多俗工索價雖高出手劣吾家小阮頗擅能

謂師 珠桂國中且耕舌忽蒙高誼獲心賞快觀奇
文舒眼纈摩挲遽與坐卧偕珍重置同鐘鼎列我
書塗鴉畫蛇足展紙吮毫殊滅裂得此空悲珠暗
投作詩永訂漆膠結

題扇面竹

琴高溪上竹千竿更有何人曳杖看六月京華塵
土滿筵頭如聽報平安

次韻繆申浦侍讀消暑雜咏八首

茶船

明窗新試月團茶茶具如浮貫月槎得捧承盤心

覺穩不妨餉客手頻叉。凹深却喜中央坦。峭厲何
嫌四角斜。直仿彝舟存古製。寧將時樣向人誇。
汲取深清活火煎。埽爐石鼎各安便。却思執爨難
徒手。須擬乘虛製小船。睡起松風生謾謾。擎來玉
雪瀉。濺濺呼僮穩。把花瓷藉入座。無容錦纜牽。

簾鈎

雅能舒卷愛輕簾。較勝芸窗繭紙黏。截取湘江千
片細。配成玉珎兩頭纖。多情入每嫌。分隔有用時。
寧待合尖步。月看花都適意。莫教閒却倚深簷。
收得溪山事事幽。捲簾須待玉爲鈎。僮僮素腕拳

偏媚孫壽纖腰折更柔垂處應防香暗散挂來不
娛燕輕投錯疑弓勢初三月向晚先懸水閣頭

噴壺

何當凍雨過林園贏得飛泉吼處噴隔嶺未能收
日脚攜壺還欲汲雲根細穿針孔容嘯吸高挈荷
盤任覆翻挹彼注茲都有藉一時流潤萬花盆
特以憐花自挈壺回青澗綠遍平蕪汲來豕漲彭
亨腹灑處峰黏綽約鬚待澤真思噴作雨吟詩合
擬唾成珠漢陰未足同風致一器先徵雅俗殊

盤香

搗麝篩沉勝結蘭和來薇露軟能蟠不須鏤木成
香篆自起攜燈爇玉盤一縷心精通裊裊三更月
暈抱團團憐他氣味殊清雅莫遣濃薰袴是紈
銀絲木柱布成行縈繞高低滿架香一瓣歷傳文
士脉寸灰真斷美人腸浮空彩結晴雲疊撲鼻濃
牽午夢長借取如螢盤上火相思有草蕪來嘗

補消夏雜咏四首

冷布

六窻方格藉周遮冷布材微綠潤麻密不瞻天輪
繭紙廉于索價勝蟬紗涼風徐引陶潛夢薄霧輕

籠杜甫花雅喜讀書宜老眼夕陽光透數行斜

塵拂

千絲搏作一枚稠登席寧堪取馬牛時有清談容
指畫非關長物慕風流熱場早遣蠅蚊避幽徑如
隨鹿豕遊暇日窻前攤飯處微塵不許到牀頭

蕉扇

霜紉雪羽價難同蕉扇團團出粵東自昔愁聞長
夜雨於今喜引小池風能遮庾亮塵來污不倩羲
之字獨工芒履葛衫都稱此納涼還立綠天中

蓆篷

高壓牆頭支木架平鋪席面罩花庭長繩繫處能
舒卷短榻移來任醉醒卓午如逢雲蔭壁清宵猶
放月穿櫺豆棚却憶田家樂招得涼生屋角青

爲彭田橋題借秋圖

田橋名惠支
四川明經

不須絃管簇飛觴雨後雲開晚景涼祇道黃金買
春色尙容我輩借秋光詩情畫筆自成券宦海塵
途如索償客邸忽牽清興遠峨嵋天半月蒼蒼

題仙霞感異集後

有序

姚佃芝侍御公子諱洙楷字魯培負才早
天其舅王蘭臯于仙霞嶺逆旅雪夜遇扶

凡老人能召新鬼魂公子降焉舅問歿後
作何狀答云已復鶴披原班頗覺自在近
與柳潭諸君子結岫嶼文社適聞舅召故
來一晤煩寄語雙親勿以爲念遂書續岳
陽樓詩一律而去蓋公子舊隨侍御之官
粵西道出巴陵登樓作記并得詩一聯而
侍御與其舅故未之見也舅歸札致侍御
檢遺篋果得記與詩爰作仙霞感異以誌
其事噫異矣千古才人半從謫籍中來固
不欲久在人間羈縻富貴獨爲之父母者

所深痛難堪耳爲作長歌呈侍御以釋其
喪明之憂云

清氣不墮埃壘中高言不出流俗胥古今才子總
仙籍謫向人間畱雪鴻不見仙霞降凡夕公子班
原隸鶴掖偶然來應舅氏招燈殘雪暗風蕭騷忽
然去結柳潭社鞭龍控鶴岫嶺下逍遙遊御天風
長彼誠極樂吾爲傷傷其聰明太絕世龍變蟬蛻
都棄置棄置萬事如贅疣平生慧業寧須畱胡爲
魂返江山夜猶然詩續岳陽樓岳陽樓下怒濤立
萬古洞庭湘女泣幽篁慘澹楓林黑離魂怨魄乘

雲集乃知仙人非世人迴腸難割惟君親聊憑遺
草傳音塵長吉赴召頗不惡童烏夙折休傷神試
看世上兒子半豚犬瘖如泉下徒紛紛

彭田橋夢予贈詩而題其字曰楮泉覺而以
爲不祥爰作此以釋之

泉法有自來成周立九府及宋用交鈔印造取諸
楮上以供軍國下以通商旅二者異龜貝流行遍
寰宇君才實有用世情所爭取入夢字楮泉此兆
天所與如何過自疑目爲不祥語王璵紙作錢陋
哉事非古六夢周設官噩懼占豈國顛倒事無常

吉凶理可觀聲伯夢瓊瑰畏死不敢吐劉子夢發
棺箠仕乃得舉始知珠玉凶不及牲幣侶得官豈
足榮致身應心許作詩釋夢詩慎毋耽隱處
時田橋欲歸蜀予勸應順天鄉試

題何明經人鶴詩集後

益州文物舊知名燕市論交遇老彭

謂田橋

攜得臺

山詩一卷讀來秋夜月三更窮邊岸獄空皮骨

何

從軍金川又以報父仇繫獄數載

孝子忠臣有性情此是人間風

雅則瀾翻巧舌漫爭鳴

犀渚春濤玉壘雲曾從杜老集中聞江山勝槩知

猶昔今古傳人合有君境歷窮愁增鬱氣胸羅海
岳蕩塵氛行蹤萬里詩千首不讓新都獨富文

題紀泮漁孝廉詩集後

古今奇士推幽燕悲歌慷慨來無端君家家世席

榮寵

泮漁係大宗伯
曉嵐先生令嗣

寧與下士傷連遭況當弱冠

騁高步鹿鳴早側賓興筵定看亮騰共朝會隔座

雲母屏風懸胡爲行吟少歡趣每到憤處常叅禪

夢裏法王時問訊覺來大海茫無邊

君有句云大
海茫茫一葉

舟又云昨夜
法王來問訊

談空轉爲諸有縛適已翻苦愁腸煎

遂令二豎相糾纏短折幾同牛與淵吁嗟乎丈夫

得志爭騰騫否則遁跡棲林泉得喪去住常隨緣
惜君懷才見不廣嗟貧歎老摧心肝至今惟畱詩
百篇鬱勃氣從毫楮傳汝陽橋畔蓬萊顛集中有汝陽春
遊登蓬萊諸作安得再起斯人躡遊履相從醉拍洪崖肩

小陽春

葭管灰知迎水德樂郊態自展晴光祇留碩果嫌
終剝聊錫嘉名借艷陽節遇至前原號小人憐春
去尙餘芳大來未及三微盛利往先分七日剛短
晷道初纏析木始裘居正啓元堂陰難獨任天心
厚數到充盈月紀良乍布寒威摧老物暗回暖律

謝東皇挾書塾畔欣遊學
穫稻村邊看滌場
空向漫思深室處
負暄如倩薄綿裝
久疎花信飛香雨
巧染楓容舞碎霜
轉眼園林逢荔挺
排空巖壑憶虹藏
宸衷調燮多生意
已有梅舒庾嶺旁

柏受甘露

聖主深仁兩大參
山川寶道啓潛涵
試看古柏濃陰密
儘有中宵瑞露含
造物栽培惟所受
凡材柔脆孰能堪
桃花趵暖舒金井
楓葉迎秋映碧嵐
或恐霜飛葭岸冷
誰期味奪醴泉甘
獨從新甫枝頭結
若到銅仙掌上探
照眼光浮珠顆顆
膠牙美愈

酒醺醺飲思五斗寰瀛北樹憶層林岱嶽南應作
虹梁隆漢殿偶存佛性倚禪龕陰盤孤秀偕松嶺
膏釀長生勝菊潭本以根柯堅似石白宜沆瀣雨
如泔瓊津入夜搏空翠黛色凌霄接蔚藍天乳零
時星煥彩金波瀉處月揚曇高憐軼盞森森立滴
欲成池拍拍滄灑向蒼顏添潤澤萃來靈液益醲
飴緣知草木華滋發恰應清寧 惠渥單上下流
同方及萬德年尊並爵爲三行扶鳩杖招于叟跪
捧神漿 賜一酎人擬後雕欣不老詩歌旣飽欲
焉貪吉雲滿載丹邱甕併入 皇朝紀美談

代國子生和法詩龕祭酒西涯詩韻

未踏西涯路徒聞西涯名西涯以人重山斗天中
橫我師富著作起家由西清讐文直芸閣視草趨
承明何幸側東序乃得逢陽城先生誦周孔弟子
聯俊英蛾術課三舍臯比中兩楹時於大小叩得
聆鐘鏞聲育才道自重餘事詩爲輕攬勝值良友
聯吟及殘更茶陵有別業憑弔使心縈蓮池菜圃
間彷彿接平生

詩文脉自通古今時豈隔況乃李公流復近李公
宅舊宅基已迷列肆地無隙惟望積水潭動影危

橋石近市厭塵囂陟梁逢幽僻招來遠山青倒卧
嫩波碧想當退食暇於此獲所適柳灣斜照時鐘
樓秋月夕欲繪輞川圖時著阮生屐觴咏欣白今
宗社思在昔長計君代憂微名臣收惜啣寃白古
人筆端幽思積

今人愛古人心好難自口音存檢衫履手植誌花
柳何況憂國心尤待椽筆剖錄功判瑕瑜論史漫

臧否安得訾太常改謚宜某某

漁洋詩太常
惜不聞靈榮

人經

闢幽潛地亦垂永久譬彼宋玉宅復爲庾信有隔
代續風騷歡然結師友披圖招十人劇飲宜六斗

我讀詩龕吟知有瓣香守却慚屬和難空令師門
負欲攀瀛海舟如仰太華藕

萬松老人歌

扶筇訪古乾石橋輒塔九級森岩堯塔前石額猶
可辨萬松老人名遠標老人生長金元代日擊烽
烟傳近郊避世逃儒販依佛菴居近市無市囂有
時風月當清宵撫琴一曲宮商調泠泠指下生寒
濤誰其朝夕從之遨漚然居士東丹遼以佛治心
儒治國此語何能出若曹居士勳名垂竹帛祇求
減事無紛呶一生得力應有在豈必術數求京焦

詩題彩扇寄蓮社想見清風松下招

崇國寺觀元丞相托克托像

大道朱門森棨戟畫棟彫楹丞相宅施作祇園五
百年衣裳冠帔存遺跡殿中金碧垂象教門上丹
青畱賜額異香不辨花草叢仙梵遙傳風雨夕憶
昔巴延謫遠方託公身居政事堂秉鈞遂得嗣乃
父辭疾猶聞封鄭王忠忱報國承恩眷人世聲華
非所戀捨宅誠能奉法王信讒何事修私怨遂令
羣奸肆宿嫌一身荷戟戍滇南燕山萬里無歸路
祇有招提一土髻

擬李西涯雜咏十二首

泉生巖壑細流繞禁城多願與熙春雨都添太液

波 海子

選勝關園林依山作屏障倩將晚景遮流照清池

上 西山

趵突尋古寺人境絕塵緣水月山雲裏相逢自在

禪 慈恩寺

清溪寂不喧石闌屹相向昨夜山雨來如聽海濤

壯 響閘

老馬苦饑渴從人飲小池憐渠同偃鼠滿腹以為

期 飲馬池

春到垂楊岸
烟迷積水灣
江鄉無限意
相看禁城

閒

楊柳灣

荒園每孤往
落月斷人行
萬籟杳俱寂
時聞鐘鼓

聲

鐘鼓樓

十畝柴門外
孤亭老樹間
年來風雨敘
一任桔槔

閒

桔槔亭

墾田倚涯海
結屋仿農家
六月午風定
開門看稻

花

稻田

種得蓮千柄
開花滿小池
憐他清絕處
如讀謝公

詩

蓮池

堂中多古書門外少車轍讀罷行灌園飽餐風露
潔

菜園

樓觀似蓬萊下臨涯海開羽人何處去時有鶴飛
來

廣福觀

肖巖詩鈔卷十終